

**Meeqqanut suli atualingitsunut perorsaanikkut inerikkiartuutaasunik ulluunerani neqeroorutitut pissarsinissamut utaqqisarnerup qaammatinik immikkut aalajangersarneqartunik qaangerneqaqqusaajunnaarnissaa anguniarlugu, Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni nr. 16, 3. december 2012-imeersumi § 5-ip allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Demokraatit Inatsisartuni gruppiat)

### **Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

### **Aappassaaneerinnineq**

Naalakkersuisut sinnerlugit qutsavigissavara Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq, peqqissaartumik piareersaataasut aamma isumaliutissiissutaat pillugit.

Ataatsimiititaliaq isumaliutissiissummi imaattumik allannguutissatut siunnersuuteqarsimavoq:

”Inatsisartut inatsisaat nr. 16, 3. december 2012-imeersaq tunngavigalugu meeqqanut perorsaanikkut inerikkiartuutaasunik paaqqinnittarfinnik angajoqqaat pisariaqartitaviinik misissuineramik aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi qulaajarneqassapput 1) illoqarfinni/nunaqarfinni neqeroorutinik peqareersuni aamma suli peqanngitsuni pisariaqartitsinerit aamma 2) paaqqinninnissamut neqeroorutit atorneqanngitsut iliuuseqarfiginiarneranni kommunit unammilligassaat. Misissuinerup inernerissavaa pitsanngorsaatissanut kaammattuutissanik arlalinnik saqqummiussineq aamalu misissuineq kingusinnerpaamik UPA2018-imi Inatsisartunut saqqummiunneqassaaq.”

Naalakkersuisut maluginiarpaat ataatsimiititaliaq isumaqatigiittoq inassuteqarmat allannguutissatut siunnersuutip akuersissutigineqarnissaanik.

Naalakkersuisut tamatuma saniatigut maluginiarpaat allannguutissatut siunnersuut siunnersuuteqartup aalajangiiffigisassatut siunnersuutaaniit nikeriangaatsiarsimasoq, taammaattorli Naalakkersuisut siunnersuut taamatut isikkoqartillugu ilalersinnaavaat.